

30/08/1998

Berdoa minta pulih gawat: MB

Saring Sirad

KUALA SELANGOR: Rakyat diminta berdoa supaya kegawatan ekonomi negara dapat dipulihkan ke tahap asal dalam masa singkat, di samping memberi kepercayaan penuh kepada Perdana Menteri, Datuk Seri Dr Mahathir Mohamad untuk menanganinya.

Menteri Besar, Datuk Abu Hassan Omar, berkata sebagai rakyat yang bertanggungjawab dan cintakan negara, rakyat tidak seharusnya mengharapkan kerajaan untuk menangani masalah itu bersendirian.

"Dengan berdoa, berusaha melaksanakan segala apa yang dirancang kerajaan seperti bercucuk tanam di sekeliling rumah, menabung dan membeli barangan tempatan di samping terus memberi kepercayaan kepada Perdana Menteri, saya percaya kegawatan ekonomi dapat ditangani.

"Selain itu, semangat patriotik dan perpaduan yang tinggi daripada keistimewaan berbilang kaum di negara ini perlu dikekalkan kerana ia adalah aset penting untuk mencapai kejayaan itu," katanya merasmikan Kempen Kibar Jalur Gemilang peringkat negeri di sini, semalam.

Turut hadir Exco Kerajaan negeri, K Sivalingam; Ahli Parlimen Kuala Selangor, Datuk Jamaluddin Adnan; Ahli Dewan Undangan Negeri (Adun) Jeram, Mesrah Selamat; Pengarah Jabatan Perpaduan negeri Selangor, Abdul Karim Abu Seman.

Kira-kira 1,000 orang menyertai kempen dan lintas hormat terdiri daripada 41 pembawa Jalur Gemilang, 100 basikal, 170 kereta termasuk kumpulan 20 kereta dan 80 motosikal Ekspedisi Hi-Rev Sukom '98.

Beliau berkata, inilah waktu yang sesuai untuk rakyat membuktikan kepada dunia bahawa semangat perpaduan yang sudah terjalin tidak akan goyang, walaupun negara menghadapi kegawatan ekonomi.

Dalam pada itu, Abu Hassan berkata, perhimpunan hari ini membuktikan semangat patriotik rakyat, terutama kesanggupan rakyat membeli bendera untuk dikibarkan di tempat sesuai.

(END)